

四庫全書

集部

欽定四庫全書

集部

古廉文集卷十一

詳校官編修臣翟槐

中書臣劉源溥覆勘

總校官降調編修臣倉聖脉

校對官主事臣陳文樞

謄錄監生臣宋德鴻

欽定四庫全書

古廉文集卷十一

明 李時勉 撰

詩詞

和答復古先生

茲山稀行跡嘉木自繁陰我嘗愛山行坐來生隱心陽
崖飛清瀑陰谷響春禽會非遺紛慮馬知山水深青苔
雨裏滑石路君獨尋參差惜乖違何以愜往忱茲竭歲

金少府八十一
卷十一
華力相逐歷青岑

旱

孟夏久不雨赤日赫高丘
溝澮無蓄水江浦無深流
山田禾未插農老劇增愁
掃地設雩祭望雲坐田頭
霖雨不可得密雲終日浮
顧此重悽傷俛仰亦何求
天瓢有餘滴孰濟蒼生憂

野老望雲

桑樹春鳩鳴農事起來早
仰視天邊雲來往田間道
虹

電耀西渚白日行穹昊澗少一綫水田多去年草欲犁
不得雨種苗復枯稿耕穫恒飢苦不耕難自保傷哉罹
此憂欲從首陽老

送解學士布政廣西兼行交趾事時平交趾立郡
縣

閣前冠冕照青春日下除書拜紫宸神武又平南海尉
綏懷遙寄玉堂賓鷓鴣不久違中禁禮樂從今及遠人
何處相思不相見斜陽獨立楚江濱

寄慣窮老人還鄉

塞門迢遞鴈門開
足馬蕭蕭入楚來
從此雲蘿成隱逸
不妨水竹久徘徊
歸田剩有閒居賦
觀國慚無濟世才
自是因君懷舊隱
望鄉頻上鳳凰臺

山家春曉

日高照見松窗裏
照人春眠猶未起
家僮洒掃及中堂
喚起客來供盥洗
披衣隨步小窗外
楊柳依依微鶯細語
皆言昨夜風雨惡
綠樹披離花滿地
老父庭前掃落花

掃開春徑莫教遮怕有客來尋舊術不妨竹裏引輕車
田家日晚歌

東郊草長牛正肥溝渠水通田可犁老翁向田姑哺兒
新婦廚中炊獨遲歸來對客少閒語但說田家有辛苦
春寒種穀不著泥北風吹麥皆入土里胥徵稅不得了
丁男出官多奔走兩月山中去不歸老身那似少年時
春深田家百事急田多草荒犁不及野鹿呦呦滿舊山
隨牛終日在田間縱及收成罷耕作官家無事身始閒

清明

昨日街頭初禁烟今日清明烟火傳家家齊上墳頭拜
更翦荆榛挂紙錢東郊古碑翳荒草近隴累累誰洒掃
問著樵夫說姓名子孫繁華難自保輕裘駿馬誰家兒
東阡西陌紛相隨關殘蹴踘忽歸去還向高堂縱歌舞

古意寄曾學士二首

百川日夜流浩浩以東注環海幾萬里不見涯涘處混
涵無不容日月自吞吐風波任蕩潏貝錯極生聚萬古

長若斯焉能為量數蛟龍挾雲雨倏忽甘澤布深弘有
如此豈比尋常具

梧桐生崇岡亭亭出雲林一朝樵夫採斤斧來相尋幸
爾爨下餘斲削成素琴粲粲絃朱絲燈燈微黃金當窗
試一彈悠然太古音清風流水遠白雲蒼山深世無鍾
子期誰能識其心

立雪齋

講學志已篤更欲從明師鵠立在函丈翼翼慎其儀豈

不思退逸進修當此時朔風吹前庭雪落何霏霏凝心
注道妙不覺寒切肌自非素志堅安取青名垂陽風激
高唱免苑誇嚴辭徒然駭衆聽名教竟何裨揆予慕前
修將殊世俗為軒居既曠達豈徒積書詩勗哉崇明德
賢哲與同歸

白土洞燒丹

閨仙幾年洞中去採藥燒丹是何處乍臨爐鼎聚精神
便覺林巒藹烟霧由來仙骨少塵心丹砂易得成黃金

姹女初凝碧天曉河車欲轉紫霞深深幽好似崆峒裏
炎井龍游虎渡水絳雪晶瑩宜可同金砂的皪寧堪擬
騰光燭夜天宇清尋常白日起風霆空山魑魅嘯爭訝
遶林猿鶴時相驚世人曾見洞天啟恍遇蓬山羨門子
刀圭入口可長年何必還餐石中髓知君好古意猶勤
賣藥壺中秋復春不肯吹笙向緱嶺要將仙術濟時人
我亦平生慕仙道神遊八極身已老眼前勝境未得親
遙望蓬瀛鬱懷抱年來多病少見知欲服還丹誰為持

可遣沉疴脫然去放歌為作還丹詩

中溪草堂

雙溪東南來奔流自縈迴朝宗遠勢合浩蕩青如苔中
溪曠望彌原陸十里人烟接喬木比屋常聞絃誦聲高
岡遠見牛羊牧故人昔住橫山前宦游辭家經幾年歸
來愛此風景好移居卜築溪水邊數椽粗朴也瀟洒窗
戶臨溪瞰平野屋裏連牀積簡編門前終日留車馬種
松藝竹環碧山蘭舟蕩漾滄浪間雲龍仙人放鶴去浣

花野客釣魚還羨君自是文章伯歸老林泉得閒適問
字人尋揚子居息交誰訪陶潛宅山田八月禾黍收豪
吟縱飲亦何求舞回鳴鶴千峯曙歌罷滄浪萬頃秋由
來勝地多山水如此清幽能有幾開門獨步少塵喧但
見青山白雲起昔聞好是平泉莊一時草木生輝光只
今零落竟何有逢人唯說鄭公鄉

友桂庭

庭前有桂樹託根固宜深鬱鬱蔽灌木亭亭出層岑冬

春不改色當夏團清陰儼立若端士幽貞無邀尋獨比
友直諒悠然諧素襟商飈動金粟芬芳被喬林有時得
醇酣對酌還自斟低枝拂舞袖深翠挹鳴禽歡賞豈有
極因之發孤吟谷風既絕響遼濶誰知音惟有蘭藏馨
可以喻同心

馮主事粉署畫故山讀書處

憶昔少年讀書處野竹蒼松藹雲霧下帷盡日絕煩囂
開帙臨窗得深趣華門蓬戶霏巖烟溪壑猶為靜者憐

孔明有意吟梁甫揚子留心草太玄清風最好窮今古
焚蘭映雪甘辛苦十年游息無與倫數畝林泉自為侶
君不見狂俠兒輕裘駿馬紛相馳白日羣遊幾人伴青
樓一笑千金資又不見富家子錦衣珍饌矜豪侈堂上
歌鐘遏曉雲門前車馬如流水但誇意氣恣所為一字
從來都不知羲和西飛花落地昨日繁華今日非以茲
感激志猶勤蹤跡頻年不出門長楊賦就人始羨金榜
名成誰不聞自從作官別鄉井羈思離懷不能屏故令

圖繪坐中看咫尺江上覺寥迴粉署長閒樂有餘朝回
對此形神舒倚檻渾驚蠹魚起臨潭宛見鮫人居大夫
出身事明主報國何心懷舊土却笑吳中張季鷹獨憶
秋風便歸去吾觀馮子好胷襟畫圖幽意頗難尋欲將
蠹簡樹勲業不負當年一片心

大雨水至

暝色凝陰處濃雲翳碧天一時傾暑雨四壁湧春泉直
似鮫人室何如海屋仙聲疑三島近勢覺五湖連可舉

任公釣堪乘范蠡船
剥床應及水沉竈
故無烟寸步誰將
引丹心自可憐
幾時及白日隨地
即周旋

白雲書舍

白雲飛繞秦川山
山中人與雲俱閒
黃金滿籬未足貴
貯書萬卷不為難
書日益多心益喜
欲把箕裘遺諸子
天上樓成忽見招
身後經傳竟誰是
丁寧為語結髮人
我死兒存書可親
莫言孤寡即消落
當知富貴須辛勤
妻賢子孝念遺訓
下帷讀書初發憤
十載猶聞佔畢聲

九霄忽覩鯤鵬運虎榜春題姓字香簪纓曳紱在周行
烏府爭看新錦繡白雲還憶舊山房山房書在人已逝
慈顏遠隔縈離思一望雲山更愴神獨宿霜臺不成寐
昨來北闕荷恩榮褒封應慰倚門情郎官追贈賁幽壤
畫繡東來別上京上京漸遠雲漸近淞水東頭是鄉郡
昔年猿鶴駭衣冠此日風雲護門徑綵衣舞罷望天門
思將忠赤答君恩馬能久作林泉客還欲離家辭白雲

送人南還

冀北霜寒正授衣西風忽與故交違馬嘶去路多秋草
旆拂離亭滿夕暉客路不堪千里別故鄉今見幾人歸
到家倘遇難兄問薊北雲邊一鴈飛

春雨山中謾興寄憶誠辨戴隱君

回風吹雲雜高樹樹底紛紛作疎雨雨多十日未開門
前頭草色連荒村故人不來老却春山陰獨立愁將昏
憶我初遊上京國君獨看人惜離別鳳臺旅思逐春雲
剡曲閒情對秋月幾日歸來接故園願分隣舍對柴關

訪舊多尋溪底棹看雲不厭門前山山家烟火人來去野
水孤村自成趣仄徑長留松竹陰低檐近引藤蘿霧草
深沙路不堪行遲爾幽居須待晴傳語先題數行字有
窗多聽曉鶯聲

題謝堅千戶行樂圖

將軍一生膽氣雄六韜三畧蟠心胷閒來校獵擁貂虎
城西倏忽又城東彎弓走馬如驚電草頭雲外人不見
射鴻彈鴈應弦落殺狐逐兔隨風轉昨聞虎來五里岡

出門飛騎何鷹揚指揮猛士盡踴躍直前殺虎如割羊
有時嬉遊到鄉里千村萬落爭迎喜挾彈歸來烏欲棲
日落營門暮烟紫自是名家富貴人何幸遭逢明聖君
豈肯偷閒度時日長懷報國樹功勲

陳百戶熙山莊

一劍功成荷國恩閒居優老信乾坤盡將韜畧傳諸子
直買山田向遠村南陌雨晴看稼穡東臯日出放雞豚
客來開閣無餘事共聽樵歌對酒樽

留別復古謝先生

青溪溪色照閒心古樹猶堪落夕陰
小徑舊時通隱處清風長日在幽林
閒窗却掃逢人坐村酒常沽不自斟
杳杳青山成別去重尋應惜白雲深

懷舊

橋頭流水漾清漪懷舊傷心淚自垂
無地可為埋骨處平生交誼竟何為

馬修撰挽詩

一日聲名遍天下幾年文彩動朝端
揮毫才思如濤湧對客情懷似海寬
常想承恩趨魏闕還思退食出長安
池邊梅閣今猶在窗外青山誰共看

畫竹為侍御韓雍題

渭水過千畝幽居只數竿清陰連野外
翠色上雲端不是全高節如何耐苦寒
風霜時淨掃塵俗可能干

候湯總兵不至三首

聞道征驂夜未休今朝可到泰安州
遲回欲候論心思

河上扁舟難久留

懸輿歸去一閒身到處相逢非故人
千里尋君今不見滿懷幽思向誰陳

只今相候已如斯別後相逢未有期
一去空山千萬里五雲回首各天涯

山水圖為王給事理題

青山江上起江深欲無路微茫島嶼間
亦有人家住日夕西風來亂捲庭前樹
江水皆起立溪雲不能駐小橋

架空鑿盡日無人度惟有江上山萬古吹不去

自鳴藁

贈陳百戶

入門問姓名知我是儒官延我入席坐取茶為我傳勸我
勿深憂謂我且自寬從容意漸密氣和言甚溫日落門已
閉但聞鈴鐸喧喚人為掃地鋪榻近牀前舉燈自起照避
溼已就乾中夜復相呼問我眠可安清晨邀我起潁盥同
一盆念此慙慙意豈啻弟與昆白首猶按劍傾蓋如舊歡

平生易為感，況爾危難間。而能脫流俗，相與出肺肝。浮雲多變態，蒼松知歲寒。感激何由報，申此平生言。

中秋書懷

盡向良宵慶太平，圓扉寂寞度寒更。愁中偏對燈花落，窗外空憐月影清。遙憶家林難作夢，時聞禁漏不勝情。至尊萬里興戎馬，今夜沙場何處營。

中秋望月

共道中秋月輝輝，向壁端預愁夜不見。故向此時看桂

影纔欲轉露華已自寒那能如舊日歡賞到更闌

送李伯亮

使車昨日到金臺綠水芙蓉花正開園堵媿勞相問訊
客居夢想共銜盃含愁不聽新鶯語躍馬還從舊路來
料得故交多出餞寂寥離思獨難裁

送人作教官

振鐸南行別縉紳不瞻風采自傷神可堪落日驚殘雨
空擬看花及早春驛路薰風初去客園垣斜日獨愁人

到家穉子如相問萬里淒涼誰是親

送御史巡按遼東

自從罹難坐園扉每聽烏啼憶繡衣
使節乘春歸上國愁心過雨對斜暉
憐分祿米情偏厚媿乏瑤瑤願不違
盡道門前可羅雀誰知交誼古來稀

寄恒遜廣文

久別相思見面難今來不得盡交歡
九年桃李湘陰滿十月風霜薊北寒
愁思不隨雲影散好懷應與酒盃寬

孤根儻有回春意好待花開共我看

感興偶成

過雨晴峯正好看又驚雲霧罩江干
冰壺慘淡清秋月松徑陰生白雪寒
江淨淺流堪濯錦竹深棄籜可裁冠
何人識得緱山路願學吹簫駕紫鸞

胡侍御贈皮裘

新製輕衣直一金能將遺我及冬深
誰憐薄命艱危日獨有平生故舊心
夜榻厭燈堪起坐風簷欺冷可行吟

長歌為感禘袍意宣效鍾儀奏楚音

與瀚子

能到園門裏相看淚泫然愛親渠意切報國我心堅身
老多羸疾家貧少藥錢但令無愧怍生死任皇天

夢長兄

客裏常相夢無如此夢悲為憐居苦地渾似在生時色
慘言猶厲情深淚祗垂不才多違訓深媿負連枝

秋夜見月

高窗正向東初月淡朦朧不見冰輪轉
惟看素練通妻孥千里外羈縻獨愁中
悵望清輝裏相思此意同

秋暮見霜

秋暮今朝始見霜客懷嬰此轉淒涼
布衣單袷增寒氣茅屋陰凝背日光
草砌蛩聲方寂寂松林樹色更蒼蒼
也知時序功成際不為鄒生獨感傷

九日醉後呈同飲諸公

園門逢九日清坐得相陪
正爾論文際紛然送酒來
狂

風吹破帽黃菊泛深盃盡飲斜陽裏題詩媿薄才

九日再酌

幾年佳節留京國今日淒涼處夏臺知己青尊聊共酌
故園黃菊若為開情飛紫禁雲長繞目極瑤臺鴈獨回
興洽暫因愁思失更將談笑盡餘盃

彭疏敬至京不得相見作此遺之

郎官遠去牧南邦倏忽還京使我傷旅館盍簪勞夢想
園門離思益愁腸春臨花縣先栽樹寒到金臺未降霜

咫尺丰姿瀛海隔苦心不寐夜偏長

征婦怨

三首

前年征塞北今歲戍邊西幾度占歸信空驚烏鵲啼
獨夜登樓望如聞笳吹聲月明沙塞遠何處是君營
庭前相送處綠樹葉皆飛借問南來鴈秋深夫可歸

雜詩

三首

幾年種桃李日望成大樹結實未堪嘗爭來摘將去
幾年作鹽梅氣質固無異惟有消渴人偏能識其味

麋鹿食田穀自向田中聚飽來山上眠豈念耕者苦

求何郎中山水圖

故園修竹映松關一曲溪流萬疊山五老天低紅日近
三山臺古白雲閒平村煙樹連空濶遠浦漁舟自往還
無那別來懷夢想憑君寫入畫圖間

在園圖中遇九日憶長兄

憶別荆庭幾歲華況逢短景陪思家鴈歸遠道書難寄
鵲噪虛簷日易斜夜卧牀幃誰共被曉燃爐火自烹茶

何時得離拘攣苦笑詠寒梅數落花

彭副使疏約過訪候久不至

知有相過處終朝不見來幾回聞犬吠數起把門開翹
首瞻車蓋專心拂酒盃徘徊日又夕客思苦難裁

北征藁

夜行關陝中遇雨次早始達榆林行在所

雞鳴別京邑日落出關門山深路逾險夜黑不待曛崖
壁上崇岑礧水中潺湲虛疑蜀川湧竇恐地軸翻崎嶇

歷險寧窈窕經屈盤微雨飄然至風勁中夜寒僕夫倦
前進欲留山下眠徘徊望陵谷萬籟俱蕭然豈不念夕
息鑿輅駐我前疲馬顧影嘶月出高林端行行險阻盡
豁焉見平原曠蕩縱游目始覺天宇寬初日照大營百
里戈戟攢行營列侍從喜遂瞻天顏祥飈捲旌旆瑞霧
霏林巒得赴屬車塵安知行路難

懷來

獨立懷來羽樹間凌秋一望意偏閒平原曠衍迷千里

古戍逶迤抱兩山近郭雲連青嶂路傍河人住綠楊灣
如今扈蹕勤征伐奏凱還從此處還

駐蹕土木閱武賜宴諸將

乘輿侵曉度層巒駐蹕平原更覺寬西去連山通代谷
北登峻嶺入長安雲飛斥候清秋遠鳥避軍門白日寒
玉帳前頭因閱武傳宣賜宴聖情歡

二十八日駐蹕雞鳴山之沙城出營閒遊

清蹕駐沙城玉帳凌高丘團營百里靜日已明戈矛田

家惜筋力禾黍尚未收盲飈吹沙塵決瀋烟雲浮晚景
風稍定天宇澄素秋轅門得隨步延目遂夷猶近矚雞
峯秀淨見渾河流去適山水情返值公與侯撫訶盛騶
從意氣赫道周古來說良將不貽明主憂豈伊重高爵
激烈著嘉謀裹革志何壯據鞍心未休一身豈復惜百
代聲名留遲回白日下欲言無與酬俛仰氣益奮把筆
試欲投拔劍坐深夜寒光衝斗牛何當一搴旗兵氣掃
旄頭歸懸藁街邸歌舞頌皇猷銘功在彝鼎彼哉不懷

羞

曉發沙城由東山間道薄暮始達宣府

僕夫促嚴駕曉發鑾輿先避彼雞鳴道迂迴由東山
險厯層疊路狹經萬盤下山入地底登高上雲端俯視
蹴飛鳥仰望捫蒼天谷崖莽無路下馬相攀緣崎嶇幾
迴轉猶在數里間旌旗蔽雲日劍戟森林巒憇陰摘山
菓斟壑漱清泉試看荷戈士飛走輕颺旋邊關雖迢遞
大道亦便便既達澹臺志驅馳固宜然悠悠日將夕始

及見平川未知足力倦飛騎得前奔疾風覺後隨條忽
達軍門故人喜我至尊酌且相歡願言勵雅操戮力奉
至尊但願師奏凱辛苦馬足論

道傍老婦

道傍老婦七十餘眼中流淚口中呼丁男征戍無生計
婦姑開荒種田地東隣西舍惜犂牛朝朝辛苦在田頭
種成禾黍連山谷秋來望收未曾熟今朝軍馬忽過來
踐食無餘真可哀但使官軍却彊敵免得丁男守烽堠

今年飢苦何足憐
明年無事多種田
一年耕有三年足
更得眼前見骨肉

宣府

北入大玉川由龍門往開平西
北由萬全出德勝口往興和

四面晴山擁翠環
孤城正在萬山間
平川路入龍門戍
絕塞雲連德勝關
扈蹕將軍齊虎衛
來朝父老望天顏
書生媿不知兵畧
懷筆轅門白晝閒

初五日暮雨後雪霽承宣草制有作呈同行諸公
雨殘飛雪浩漫漫
積素連山正好看
冷透綿衣添更薄

暗飄油幄溼難乾雲開帳殿笙歌靜月落營門劍戟寒
天上傳宣催草制華燈歸送到更闌

沙嶺營中夜坐作

太乙鈎陳到月明連營殺氣夜中橫彎弓欲射旄頭落
還從鑾輿出塞行

沙嶺

在宣府之西此由萬全出德勝口往
野狐嶺由萬全左入紅堂口往山西

平沙浩茫茫積嶺長風吹射目星炯炯揚颺烟霏霏草
莽被高阜河水流南崖自從出關來幾日纔及茲四出

環城郭到處長相隨險阻自天設從古已如斯西通白
登道北接狐嶺陞鎮衛列兩戍士卒雄虎豹連營堅守
備敵人焉敢窺聖心猶未寧秋巡動六師豈惟振威武
實欲安黔黎熊羆盡奮發白日雷電飛獨慚劍術疎報
恩將奚為

送林御史還北京

獨持使節出臺端關外人爭識勇冠行在趨朝朝復命
轅門握手夜同歡北征殺氣天邊肅南去霜威馬上寒

歸見故人如有問軍中無事頗閒安

八月初九日初聞鴈

曉侍軍門到夕暉忽驚賓鴈向南飛靜流寒影迷青嶂
遙帶秋聲度翠微作陣豈防矰繳患隨陽寧為稻梁肥
尋常不羨傳書美能使看羊仗節歸

駕發沙嶺度陽河沿邊父老來迎和黃中書韻

鑾輿行處曉風和父老來迎臨大河六師百里迷赤岸
萬馬一飲無清波報主誰知寸心苦臨邊自把長劍磨

定須遠紹甘陳績還遣邊氓聽凱歌

與黃中書入萬全城訪王主事

聯轡徐行入柳陰連雲雉堞噪寒禽人家土屋風霜古
官府門牆樹木深絕塞孤城千里道舊交尊酒百年心
垂鞭信馬歸營去天淨山高日未沉

題黃中書畫竹贈王主事

行營寫竹萬全西翠影脩脩望欲迷客至只疑臨嶰谷
興來渾憶釣璜谿虛心寒慙風霜勁密葉春承雨露低

自是郎官堪比德新詩吟罷為君題

八月中秋日午一時颶風起南北雲陰而中獨見
日南山外雷雨大作須臾而霽

每逢佳節愁陰凝八月十五尤喜晴百里精兵臨塞駐
一時颶風疑海行天中白日臨空淨山外黑雲飛雨聲
轟雷掣電在咫尺倏忽還收宇宙清

楊名堡

堡在萬
全西

楊名舊日說繁華桃樹垂楊繞縣衙自掃邊塵清朔漠

空餘雉堞亂啼鴉連村禾黍猶千畝滿堡人烟有幾家
訪古從容問耆老出門不覺夕陽斜

黃鼠

柘彩凝沙暎日光平原窟宅翳蒼茫拱門豈畏飛鷹搏
入穴還如狡兔藏物類生來形獨異天廚賜出味偏長
好當校獵捐軀日莫遣傍人謾得將

擬題

飲馬窟

飲馬長城窟馬多水不乾無人到關塞甘好有誰看

俠客辭

堂中無復事誓與報君仇一劍成何用空令易水羞

摘瓜辭

辛苦黃臺下秋風瓜蔓多不堪回首望落日獨悲歌

牧羝曲

漠漠黃沙外寒氍抱雪眠此心誰復識白日在青天

商婦詞

十年不到家到家便辭去安得作大石塞斷前頭路

續絃詞

煎膠續斷絃絃好琴音和莫彈別鶴操好鼓南薰歌

夜至萬全城中小寺適寺僧亦自塞上歸

晚來尋小寺直在古城間石路斜通市禪房遠見山夜
中孤客到月下一僧還靜禮無生法空門不記關

九日

插柳樊籬遠似村正逢九日在轅門摘花隨意看春色

倚劍長歌對酒尊
醉裏猶懷陶縣宰
風前誰憶孟參軍
千官扈蹕承歡宴
獨媿無才負聖恩

九日呂尚書送燒酒

葡萄家釀到邊頭
九日分將意獨優
可是王弘知靖節
不勞庾信問蒲州
開壺泛菊香猶遠
倚醉題詩興未休
自覺晚來寒氣薄
臨風不用襲輕裘

雨中與黃中書園棊

對雨臨棊局終朝興未闌
潰圍嘗蹈險取勢每由寬
動

靜懷張說從容憶謝安
須令強敵滅賭勝任為歡

自鳴續藁

送黃恒脩還鄉祭掃五首

南還六月別都城
獨阻臨溪送客行
捲地朔風吹急雨
綠楊何處有啼鶯

薊門昨夜雨如傾
潞渚朝來波浪驚
自是虛舟能獨往
商船持重不堪行

南行誰喜說南風
獨棹扁舟逆浪中
夜宿廣陵逢北客

幾人相語此心同

帆轉青原是故鄉
頃令桑梓有輝光
因君遙憶先塋隔
悵望南天淚幾行

封章激怒九重天
亂撲金瓜玉陛前
歸到鄉閭親故問
幸留殘喘不須憐

商婦怨 二首

百歲似相期
安知有別離
去時兒在腹
今已長過眉
憶昔初結髮
兩鬢黑如漆
但恐君歸來
白頭不相識

楊柳枝

章臺大道邊
栗里舊門前
苦被行人折
何如伴醉眠

白頭吟

交頸鴛鴦思
鳴琴誓此心
如何未終曲
已有別離音

桃李樹

託根遊宴地
寒樹亦花開
獨在淒涼處
春風淚滿腮

古意 二首

落日層樓上
當歌忽自悲
空令翻白雪
此曲少人知

海上望仙山
鏘然響珮環
如何一水近
不遣離人間

流水曲

滄江無日夜
脈脈向東注
曲岸多淤流
好為操舟渡

張百戶惠李

惠來仙李好
礪砢出水盤
瑩潔虬珠潤
頰紅瑪瑙寒
自應同石髓
誰復羨龍肝
若遂王戎意
如今那得看

齊百戶送冰

夏熱已難度
況此居樊籠
徽纒削我體
炎暑毒我中
故

人致清水高誼誰與同蕭爽逼涼氣頓覺如嚴冬食之
肌骨清煩慮俱消融不聞鳴琴奏怡然對春風沈思艱
危際感激意無窮

李指揮惠桃

仙果何處來採摘瑤池濱香含雨露潤色染臙脂勻結
實自有時豈必三千春方朔狎恩愛田疆懼苦辛王母
何不恡齊相何不仁世情甘近味幽思誰與論感意良
慙慙稍以清形神瓊瑤媿相報述古聊為陳

章郎中送茶

雀舌金芽玉色鮮
貢餘獨得大夫憐
寄來春日聞雷動
採摘雲林禁火前
手閱香逾仙掌草
鼎烹味勝惠山泉
玉堂曾是誇風韻
何似陶潛樂醉眠

七夕喜晴

盡說窮陰七月多
忽驚此夕見明河
欲令霄漢星辰會
不遣陽臺雲雨過
士女茶瓜爭乞巧
天孫機杼暫停梭
可慚獨守潘生拙
圓圓詩成只自歌

紀夢

萬里雲開天欲曙
紫陌鳴珂早朝去
覺來窗外雷電驚
捲地朔風雨如注

與梁指揮飲燒酒

宛勝葡萄釀何須鸚鵡盃
入門便相喚到手不教催
深意憐吾渴愁懷為爾開
醉時即高卧不省有人來

月下行吟

夜卧不成夢淒涼
誰見親起行明月下涼
影伴愁人

中夜飲酒

中夜渴欲飲起來還自斟數盃應不醉燈下獨愁吟

夏夜

斗轉銀河仄虛窗瞰遠天夜深明月裏夢繞五雲邊

夏日雨中

黑雲半空來飛雨門前度但聞啼鳥聲不辨雲中樹

十四日晚至陵下

昔從多士侍朝廷嘗對龍顏展寸誠今日共來供祭祀

獨瞻松栢不勝情

天壽山路傍林禽樹

路傍林禽樹朱實亞枝垂行人不敢動山鳥時來窺

路傍棗樹

人家棗園本無路未熟人來偷摘去此中棗樹在路傍
從人往來莫敢取

過晉賢行路皆稱張尹有善政

試問肩輿者應知令尹名饑羸俱樂業克暴少橫行

獄無囚繫山村有頌聲誰言漢卓魯前史獨為榮

五兩

日日船南去颺輪忽向東舟人喜相報正是渡江風

謁孝陵

橋陵一別恨歸遲松栢青青似舊時漢室規模長在想
鼎湖雲氣不勝思儀文盡洗前朝弊禮樂終為後代規
對越威靈在天表壯年不遇老來悲

辭陵絕句

八首

太極纔分有此山龍飛鳳舞擁天闕靈宮負宸端居處
正在雲霄杳渺間

蕭森松柏結愁陰白日常懸舊赤心翹首不瞻龍鳳質
空流清淚滿衣襟

昔年端冕在楓宸治化流行疾若神萬國車書歸一統
四方風俗盡還淳

讀書直以古人期記得當年拜命時天地恩深無所報
一登廷閣一回悲

昔日天門侍聖明
春回枯朽荷生成
鼎湖龍去青天遠
獨抱烏號淚雨傾

曾從鑾輅出邊陲
擄得名王奏凱歸
從此沙場無戰鬪
至今遠塞震皇威

少年鳳闕侍龍顏
天語從容咫尺間
今日玉音何處聽
不勝悲苦望椿山

每遇春秋上謁時
傾心只恐到來遲
如今歸老辭陵去
回首雲山不盡思

十八日發張家灣

楊柳初青黃鳥鳴長河兩岸綠波平乍從客路看帆影
還想君門聽漏聲七十挂冠雖稱意五雲回首尚關情
深恩未報身先老俛仰乾坤愧此生

連日行舟大東風

長風吹河水倒流對此如何銷客愁半日纔行三十里
幾彎還見一孤舟商船屢過詢名姓驛吏頻來問去留
計日算程關路遠菊花時節到林丘

宿螺山菴

菴屋幽僻靜無譁十里青山一徑斜
舊引泉流長遶澗新移茶樹正開花
荒田草合多寒雀曠野林稀少暮鴉
日夕相看誰是伴清風明月與烟霞

去伐遣人送五月菊石菖蒲詩以道意

金錢帶露榮雲光九夏開時分外香
若使當年陶令見賞心不但在重陽

仙家瑤草種初成此日分來獨有情
願遣山居塵俗遠

何須嵩嶺說長生

余自城中逢與粟同歸過去伐隱居留宿明日告別去伐又欲留有不滿意作詩贈余勉強和之云

城中逢舊友返路喜追陪欲到壺丘去先過剡曲來春舒江上柳風度竹間梅留住堪能久無端歸思催

山居病中即事

山居少田種江上旋開荒有病多收藥無醫只檢方雨

金人日八卷十一
餘千嶂淨春暖百花香遊覽無筋力沉吟自可傷

一春淫雨閒居寂寥有懷故人率爾短述

解組歸來初學耕野田數畝不聊生家貧作事難稱意
年老逢人只順情久雨郊園多草色殘春堤柳少鶯聲
何應得有巡撫使為我回轡到山城

久雨

一月雨淋漓山雲拂戶低路歧泥沒馬猷猷水平溪江
上看濤湧林間斷鳥啼新居無覆瓦終夜竟何栖

病中偶成

去年病發到今春
春夏炎蒸病又新
窗下檢方無驗者
眼前知己有何人
通宵藥鼎常存火
五月綿衣未去身
不是平生甘寂寞
可堪衰疾更長貧

病中去伐見訪

閒居聞我病獨騎
遠來看見面深相
慰中心便覺寬坐
留菜羹飯好似綺
筵歡臨別無為贈
濤牋寫肺肝

題蓮

四首

芰荷開處藹芳馨
鸕鶿雙雙應曉晴
絕勝金灘溪水上
時來還見繡衣行

鴛鴦飛下水東西
十里芙蓉望欲迷
只少紅粧隔花語
此間不是若耶溪

飛來白鷺傍紅蓮
宛在華岑玉井邊
亦有花開逾十丈
可應得見藕如船

頽霞翠霧護蓮房
風度晴漪漾日光
好是昆明池上見
粉紅墜露散清香

新梢捧日

密葉新梢長結陰
亭亭直節出平林
誰言解籜初成竹
便有雲霄捧日心

淇園暑雨

碧樹琅玕翠作團
不勝酷暑葉聲乾
須臾霖雨從天降
信有人間六月寒

渭水秋風

古木脩篁綠蔭稠
一川浩浩自東流
鏘金戛玉清如許

不為狂風也似秋

老幹凌雲

老樹疎篁自作林
蒼藤翠葉歲年深
莫言蕭索寒冬裏
歷遍風霜却到今

送劉思清分教惠州

衰老常多病那堪
送客行且將京國酒
聊慰故鄉情
瀟水秋容淨
梅關雪色清
惠陽施教日
帳下盡羣英

伏日燕餞謝謙牧大尹分韻得揮字

盛時多令節佳會未能違鳴珮趨清禁聯班近紫微大
官應早到方朔豈遲歸華館開朝宴清尊對夕暉運交
金伏火暑赫汗沾衣玄鳥先秋去蒼蠅傍席飛羽觴從
數勸紈扇不停揮明日南行客歡筵似此稀

送謝謙牧知黔江

京華燕集幾論文作宰南行忽離羣鳴珮自應辭聖主
過家喜得拜嚴君金臺鳬影三秋別巫峽猿聲兩岸聞
自古循良多善政須令黎庶樂耕耘

送謝謙牧還任黔江

作縣三年政有成，東來萬里到神京。
褒書已荷天邊寵，歸棹還從峽裏行。
暑雨離亭看柳色，秋風客路聽猿聲。
黔江江上棠陰下，多少兒童竹馬迎。

益菴為謝謙牧大尹作

端居玩無極，悟此造化機。
日中固當昃，月滿輒復虧。
何如東大海，得此江河歸。
萬古未嘗溢，一水不曾遺。
鐘聲自虛出，噫氣從空吹。
所以古聖人，德邵心益卑。
君子契。

明義往跡誠所希開軒向前峯那能見崔巍簣積高自
下水流汙成池行矣貴有終姬孔真我師

黔江三瑞

有序

民安政善實相宜和氣蒸祥正此時瑞麥兩岐真可羨
嘉瓜並蒂亦何奇更看白燕離羣出為顯清名與世知
自昔中牟誇異政由來循吏每如斯

黔江大尹謝君謙牧為政既六年政洽民安邑以無
事百里之間和氣充周蒸為佳祥麥秀兩岐瓜實並

卷十一
帝世或有之至於紫燕產雛異色潔白玉立離羣則
未嘗有也豈其清修苦節有以致然也耶昔魯恭為中
牟令有三異政垂譽無窮今謙牧之在黔江能致三
瑞之應如此事雖不同而所以為政之善則無以異
也固將光昭竹帛而後先相輝故為賦此詩而識以
歸之

挽謝處士顏良

幽隱孤城外園林二水間門前數竿竹屋後萬重山座

隔紅塵遠心同白日閒只今那可見烟樹暗柴關

瀟湘竹二絕為謝大尹尊甫尚哲題

論文作賦興吟詩還憶當年游泮時一任京華今皓首
何如蕭散在東籬

又

江邊修竹遶雲林三徑脩脩翠色深何日歸來尋舊隱
看雲坐石話同心

古廉文集卷十一

欽定四庫全書

古廉文集卷十二

附錄

雜著

勅命

勅曰國家置文學侍從之臣而用之於講讀所以資其學問之益蓋非博洽端重之士曷足以稱爾翰林侍讀承德郎李時勉早以經術發身賢科荷先皇帝期待之

厚俾進學于中秘既屬秋官克著聲稱遂參史事遷職侍讀行藝卓著益勵不懈是用錫之勅命以示褒獎於乎講讀以明道而治所由出也士之欲致君澤民者莫出於此其益懋誠敬正學以言用光我寵命欽哉洪熙元年三月日

誥命

朕惟翰林學士之職朝夕左右所以備顧問典詞命非內外百司之比故必簡學博履正之士居之庶以稱厥

官馬爾行在翰林院侍讀學士李時勉科第入官持志
端慤事我皇祖皇考薦登侍從以至于今纂述編摩率
殫乃力暨三朝信史益克盡心是用進爾官資俾貳其
長庶厚祗飭久而不渝考質論思允稱厥服今特陞爾
階為奉直大夫職如舊用示褒嘉夫文學施之朝廷者
必推於先王之道乃可貴也而自古君臣之相知難矣
朕既不忘爾勞爾益圖懋厥績以永有嘉譽欽哉宣德
八年九月日

御祭文

卿以剛介之資通敏之學發身科第進職詞林歷事累朝多輸誠悃列聖眷遇賢譽用彰爰自翰林遷掌太學作興造就士類有成方諧致政之休詎意遺榮之速倏茲聞訃傷悼惟深遣祭卿靈尚其欽服景泰年月日

誥命

奉天承運皇帝制曰我國家昔有老臣歷事列聖常懷致主之志確守為儒之規惟身雖沒而猶存肆恩已頒

而重錫故國子祭酒謚文毅李時勉孜孜問學慊慊操
存紬史講經懋克脩於厥職責難陳善尤克罄於爾誠
迺掌玉堂迺師璧水領袖華國之衆彥模範用世之羣
英晚節高進退之風夜臺承褒卹之澤尚鬱士論致達
朕聞今特贈爾禮部左侍郎改謚忠文於戲繼迹先賢
得此易名而良鮮竦聽後覺由今垂譽以何長永矣不
忘嗟哉無愧成化年月日

像贊

金匱要略卷十二
老友楊士奇贊

氣充而志端外和而內剛其學也本原純深其文也篤
實輝光史館謹嚴經筵裨益有規有矩惟正惟直玉署
金馬四朝于茲國有老成儒有表儀冑監成賢允屬耆
老需祐隆平天子有詔

弋陽李奎

其儀慎肅其貌清癯志奪三軍之帥胸蟠萬卷之書行
之潔也無愧古廉之號學之確也誠為君子之儒歷登

華要處之裕如節操貞松勁栢襟懷秋月冰壺于以揚
芳翰苑負文章之重望進秩胄監為天下之師模又豈
不與昔之令狐綯孔穎達之並駕而齊驅者乎

自贊

爾之貌不魁梧而秀麗爾之心不機警而婉委爾之學
問不廣博而深宏爾之文章不豐贍而華美動止粗率
言辭鄙俚徒竊科名以取祿位承荷寵榮恬不知愧雖
然爾生六十有六矣不為不仁不為不義不矜已而傲

物不徇私而慕利於人而無所爭居官而無所恃今之
所以貌敬而不忍欺者其在此歟吁汝其慎之以保終
始

行狀

朝列大夫翰林學士國子祭酒兼脩國史知經
筵官致仕諡忠文安成李懋時勉行狀門生湖
廣按察司副使參贊廣西軍務前翰林編脩同
脩國史同邑中溪彭珣述

先生諱懋字時勉號古廉姓李氏其先系出南唐烈祖
第五子景遷之後景遷累封江王嘗為虔州節度使簡
易節儉號稱賢王王之子曰瀚宋平江南瀚匿跡虔吉
間吉守李邕聞其賢求見之不出乃辟其子先為閩嶺
鐵務官俾以祿養遂家安成東門光三子十一孫孫兩
為府尹一為縣尉自是子孫益蕃衍擢高科登仕籍者
比比其人有諱疎林行正一翁贅居梅林劉氏遂家梅
林梅林之李自正一翁始諱本字源芳先生曾祖也諱

煒字文明先生祖也皆有隱德考諱夢觀字思誠端厚
坦亮洪熙元年以先生貴贈翰林侍讀承德郎宣德八
年加贈侍讀學士奉直大夫妣凍坑周氏繼社背王氏
俱贈為安人加贈為宜人五子長時傑號恒心性耿介
穎悟過人次時春早卒時魁時彥其第五即先生也先
生生洪武甲寅八月丙午先夕學士翁夢一異人至家
神光燦然翌日生先生明年睟日翁循里俗告祖先畢
鋪席于地羅置書冊筆墨錢菓諸物於席上為試周先

生先取筆次取墨又取書學士翁大喜曰符吾夢矣五
歲屹如成童投靜室勤學隣兒有牽引戲狎者輒辭去
七歲孝經小學四書皆已成誦十二三詩詞歌賦語皆
驚人十四五言動不苟即以聖賢自勵嘗曰顏子不貳
過不遷怒曾子曰三省其身予所願學者二子也十六
入縣庠大肆力於羣書攻習舉業之外益究道德性命
之學寒不能置爐炭擁重衾實木桶置足其中達旦不
寐其刻苦類如此訓導城門持真尹先生理安胡先生

皆篤行儒者一見先生竒之嘗曰李時勉用心理學豈
詞章之儒可比丁丑學士翁寢疾先生親侍藥食不就
寢席者旬餘無怠容是年七月學士卒先生與諸兄居
喪治葬率循文公家禮行之已卯十月釋服永樂癸未
中江西鄉試明年甲申中會試賜同進士出身時太宗
皇帝御天下慨然作新人材興起斯文於進士中簡明
秀通敏者二十八人改翰林庶吉士俾就文淵閣讀書
免常朝光祿供膳司禮監給紙筆內庫給鈔為膏火之

費蓋期之於伊傅周召韓柳歐蘇諸賢而先生與焉先生益自淬礪磨濯造詣精深同列亦多推讓之明年預修永樂大典丙戌三月丁丑王宜人卒于京先生與兄恒心奉柩歸葬居喪如禮七年春起復是年車駕幸北京仁宗皇帝居東宮監國召入直房修書尋徵赴行在賜路費鈔六十錠至則命錦衣衛撥官房預修太祖高皇帝實錄十年壬辰授刑部湖廣清吏司主事時四境苦於寇盜有捕送法司者輒峻拷訊雖連及平人亦不

為之仲理先生獨推情審辨不事煅煉獄成待決者止
十七八人其存心仁厚用法平恕多類此刑部尚書張
公稱之曰李時勉古仁人君子也十一年授承直郎十
二年詔重修太祖高皇帝實錄先生仍預焉冬十二月
進承德郎十六年實錄成賜鈔襲衣文綺改翰林侍讀
九年夏四月庚子奉天文華謹身三殿災太宗皇帝降
勅求言先生備陳十五事一曰停止工作二曰罷四夷
朝貢三曰沙汰冗官四曰賑恤饑荒五曰慎選舉六曰

嚴考覈七曰清理獄囚八曰罪黜贓官九曰散處黻官

十曰罷遣僧道十一曰買辦作弊十二曰

闕

軍夫

十三曰矜免侍親充軍生

闕

十五曰

優恤軍士所言多中時病有旨下所司行之未幾為飛
言所中下獄二十一年七月邊人內侵太宗皇帝念前
所言散處黻官諸事慮患深遠特宥之仍舊職扈從北
征先生出關墜馬折左股舁歸京療凡三月餘跛不良
行洪熙元年三月仁宗皇帝頒賜詔命封贈父如先生

官妣及妻劉氏皆為安人先生既受勅感激思圖報稱因覩時政日漸違節賞罰予奪恩讐太過鮮愜中外之望仍備陳其事若干條析為二本其一厯言朝政得失利害具一專於責難陳善具言此本乞留中勿使外知前本宜付所司衆議行之二本既進即焚其稿仁宗皇帝見所言峻直怒甚中官從而擠之次早臨朝震怒命將軍以所執金瓜撲之瓜及體者十七八脇肋已斷其二意其必死矣命曳出及視之神色不動猶能言時侍

講羅汝敬亦嘗言事上罷朝諭吏部曰李時勉羅汝敬俱有才幹在翰林院間了其改為監察御史李時勉交趾道羅汝敬雲南道俱令掌道每日問囚一起言事一章凡三日先生三上章言事遂下錦衣衛獄施以嚴刑先是折脇內向不相着及用挺棍而斷肋忽自接人謂先生忠誠感動天地若有鬼神陰相之也宣德改元冬十月宣宗皇帝幸萬歲山謂左右曰李時勉所言為社稷計忠臣也立召至前備問激怒先帝之由先生奏對

懇切感動聖衷特憐而宥之仍為侍讀預脩太宗皇帝
仁宗皇帝兩朝實錄五年庚戌五月陞侍讀學士一日
駕幸史館撒金錢賜儒臣拾者爭趨前先生獨退立不
進宣宗皇帝獨呼前拾故得金錢尤多無何駕幸文淵
閣命內臣舉金盃次第賜諸學士飲至先生獨名呼之
曰李時勉卿非朕安得飲此酒先生叩首謝曰臣蒙陛
下再造之恩不勝感戴自是傳保而下始知聖意寵眷
先生日隆七年壬子命為南京鄉試考官秋還京八年

癸丑掌翰林院事一日得風疾不語上聞之惻然遣中官賜寶楮二百錠偕太醫院官就其第視疾給藥連三日中官更至守視奏報頗愈入謝恩仍賜休息九月頒賜詔命贈父如先生官妣及妻皆宜人十年己卯預脩宣宗皇帝實錄是年秋命為順天府鄉試考官正統元年丙寅兼經筵講官三年戊午二月給授勲階協正庶尹四月實錄成陞學士六月給假還鄉祭祖東里先生不忍舍以序送之又嘗為李氏族譜序及贊則東里重

愛先生大畧可見四年己未先生在鄉歲旱苗將稿先生齋沐率鄉老徒步犯烈日禱大雨沾足禾稼豐登先生初得善地于中村適有故人劉君伯淳死遂與葬之是年以劉宜人暨兄時魁二喪在殯未葬力求善地葬之又遷葬兄嫂子姪凡六喪地皆新得得皆以義非力取也又創南溪居室令第二子養敬居之秋七月還京六年陞國子監祭酒八年癸亥重建太學成上命先生致告于文廟九年甲子三月朔上親釋奠先師孔子禮

成視學賜坐先生講二帝三王治天下大經大法甚悉
未復陳諷勸之言音吐洪暢天顏悅豫一時文武臣僚
肅然聳聽莫不欣喜明日奉表謝恩賜紵絲衣一襲羅
衣一襲又賜宴于廷斯文際遇之隆未有盛於此也先
生在監多所建畫上皆從之師生稱便諸生有疾親給
醫藥有貧不能娶死不能葬者為給費賙之其教諸生
以毋自欺為本以忠孝為先隨其才質高下誘引成就
之絕私謁之路杜幸進之門草奔競之風禁淫蕩賭博

之習諸生數千人皆肅然樂從其教成德達材彬彬輩
出國學得人於是為盛丙寅先生屢以老疾乞致仕諸
生伏闕請留上以太學師資之地方倚老成不許其去
丁卯先生年七十有四病益深上章乞骸骨上覽其言
甚懇切遂許之詔兵部具舟陸辭之日賜鈔一千貫命
光祿具酒饌餞之及行達官顯人多出崇文門外以敘
別太學師生以綵幣製旗幟各為文詞諸生親厚者又
命工繪恩榮歸老圖取其事為十題求諸名公識以為

贈以頌先生之德翰林舊知亦各為文為詩教坊諸樂
工椎大鼓雜以金石絲竹之音喧然前導送者凡三千
餘人遠近觀者塞路一時行旅不得往來商賈為之廢
業莫不嘖嘖焉稱羨以為榮至有為泣下者諸生又以
先生平日廉潔自守行李蕭然乃集白金數百兩為贐
先生悲卻之今太師吏部尚書王公直為十題稱先生
漢之疏廣唐之楊巨源不能過也其餘若禮部尚書胡
公澂工部尚書高公穀左都御史陳公鑑禮部尚書王

公英國子祭酒蕭公鉉侍講陳公詢徐公理修撰劉公儼檢討錢公溥司業趙公琬南京祭酒陳公敬宗皆有文為贈先生自北歸以故居去城稍近倦於逢迎遂卜邑西三十里其地曰梅壠創隱居焉遠方慕名以求文至者踵踵相繼先生以病多謝去前此土俗不立社不祭社厲過夏多缺雨先生創空地為社又創地為社厲壇率旁近之家循古禮祭之約以為常至是雨澤應期連年皆熟父老喜曰古有隨車雨先生似之先生雖處

林野而其心未嘗不在朝廷景泰元年三月嘗建議四
事一曰獎忠節二曰修武備三曰加恩賞四曰通和好
具本遣長孫騏達于朝騏既行三日先生在別墅病作
四月十二日謝世享年七十有七易簀之先戒諸子曰
治後事悲如汝父送汝祖循古制勿尚浮屠言訖而逝
無一言及家事有司以聞上深加悼惜遣官賜祭是年
十二月某日葬雙峯鋪東某山向葬之日大雪送者幾
千人初娶縣背劉氏繼冠縣劉氏子男六人曰融字養

和虞字養敬皆卒原字養源剛字養健早卒縣背出也
良字養道鼎字養端冠縣出也女二人河南參政王公
瀘源第五子固始教授邦正禮部郎中陳君鉉長子晉
其婿也孫男十九人騏驎驊駟知縣馴泮生昂監生
曾孫男二十五人先生德性粹美操履脩潔事父母處
兄弟孝友篤至事君忠義激發不為身謀遇朋友誠而
有禮緩急可以託死生修撰彭君汝器抱疾無子弟在
側先生以同年故竭力扶持湯藥如至親然既卒哭之

盡哀具衣衾棺斂如儀已而有命遣族人傳送其喪歸
葬先生仍為哀集所為文稿付其子初太常博士劉君
履節有交趾之行妻病子且幼乃以託於先生而去去
未幾妻死先生為之斂殯如禮是年劉君竟死不反先
生撫育其子女如已子長為娶妻教以經學俾有成立
發身科目仕至國子助教皆先生力也其篤於友誼如
此平居衣冠端正凝然不動與人語詞嚴誼正是非子
奪確乎其不可易天下之人聞其名而慕接其貌聽其

言為之改行易心者衆矣其在朝尤為公卿大夫所推重少師東里楊先生嘗稱於人曰時勉當今第一流人也故於經濟大畧密與商論者居多侍講鄒先生緝曰時勉可追配古人學士高公穀曰先生文學足以媲美乎陸贄忠義足以追蹤乎汲黯道德足以比肩韓愈世以為知言先生學問與博詞翰兼美有得其片言隻字者寶重之如拱璧故平生文稿多為好事者持去所存於家者殆十一二耳既葬之後其遺孤屬疏以狀而疏稽

於王事未及成又二年琬致仕歸巡撫江西都憲韓公
雍以先生節槩上言賜諡文毅琬念先生與先君編修
公最相善而琬兄弟皆受學焉慨先生不可復作思欲
昭其德於不朽實琬之大願也第先生之德高大遠密
非拙工所能彷彿形容謹述其槩如右俟知者采焉

故祭酒李先生墓表

光祿大夫少傅兼太子太師吏部尚書泰和王直撰
先生諱懋字時勉姓李氏系出南唐江王景遷之後世

居安成之東門以宦學顯曾祖源芳祖文明父思誠皆有德誼而不仕先生少負大志勤於學問窮性命道德之奧於書無所不讀永樂初取進士第太宗皇帝銳意文學擇進士之尤者俾盡讀中秘書學古為文辭先生與焉其文學日進有盛名以母憂居喪務盡禮服除授刑部主事而所治無寬入與修高廟實錄成授翰林侍讀先生自以蒙恩厚思所以報殊遇早夜孳孳盡其職凡事有當言者輒以聞上亦多所聽納雖時被箠下獄

旋復釋之宣宗皇帝尤肆矜容陞侍讀學士待之加厚
賓興之歲三命典文衡上臨軒策士則命讀卷人皆服
其公正統初上御經筵命先生兼經筵官當進講必盡
誠敬冀有所感悟上亦為之傾聽聞者莫不稱善以為
范淳夫其人也時太學缺祭酒而難其人諸公皆謂莫
如先生相與言於上遂以任之諸生數千人皆習經藝
先生開導訓誨各因其才以窮其旨趣俾有所領解如
飢者得食渴者得飲於是小大皆有所造就病者有醫

死者有歸其未娶者俾有室皆先生出資為之倡而仁義之行成焉諸生事先生亦如子之事父有急必赴雖危難不避賢才之盛彬彬焉一時見於用者人皆以為宜車駕視學行釋菜禮退御彝倫堂祭酒當以經進講而先生久病嗽人疑之至是升堂愈敬慎色溫氣和賜坐西南隅講尚書闡明帝堯所以親親仁民協和萬邦之道辭旨清遠聽者忘倦上為之喜甚賜予有加明日入謝又賜宴錫衣一襲人皆謂先生宜之正統十二年

以老疾乞致仕諸生亦拜疏乞留先生請至再三上亦
察其病許焉賜鈔二百錠官以舟載之歸之日滿城送
者無貴賤皆嘖嘖稱道諸生則曰先生歸矣吾何所視
法哉連數十里奔走涕泗如送其所親先生既歸卜築
城西山水間不與流俗接惟教子孫及鄉族子弟使讀
書為善而已其德行文章蔚然為天下之望蓋有嚮仰
不及之嘆者景泰元年四月十二日以疾卒于家事聞
上命禮部致祭遠近士大夫皆弔哭往來不絕者數月

其生以洪武甲寅八月十三日享年七十有七娶劉氏封安人先卒生男四人養和養敬養源養健繼室劉氏亦先卒有男二人養道養端以某年某月某日葬于某里某山下予與先生同郡人同年取進士又同入翰林仕而同朝者四十五年思請益於先生以老終而先生遽去今又棄予往矣予何能不哀先生既葬子養源等謀於其鄉之大夫君子求予文表墓上嗚呼予聞昔安定胡先生之墓為之表者歐陽公也今先生之墓當求

如公者屬筆焉予文何足以揚先生盛美哉然不可辭也故述其行之大者俾刻焉

古廉李先生小傳

門人行人司行人尹恕撰

原
闕

仁宗改元先生又疏陳若干條為二本進皆犯顏格心
之言扶持綱常之道左右不悅構之上聞所言峻直召
問不屈命撲之折脇曳出不死改行在交趾道御史日令
問事具條以進次日有旨繫獄遇良醫得活在獄中水
漿不入口者五日而神氣自若卧幾一月而愈是時庸
人孺子皆知先生忠義所為若有神明護佑非偶然也
宣宗皇帝嗣承大統先生在獄惟吟咏情性自適是年
秋有燕入於先生幕聲喧不已時同獄者以為先生喜

其夕就寢忽夢渡橋橋斷下有一覆舟從舟背而渡有水崖不得上傍有一朱衣人扶上之云明日橋成可無事矣覺乃夢中爾天明果宣至文華殿內見上推詢建言之由先生復以忠鯁之言對遂命收獄輒取回再問其由辭語如昔復呼至前欲備詢之先生誦向前所言至第六事少止上曰事尚有何以不言先生曰天威嚴重臣不能記其詳矣上微哂曰是第難言耳汝之諫藁在否先生對曰藁已焚矣臣讀聖賢書忠孝是先敢不

直對上以其言始終不變可任以事宥之命以次日早
大班謝恩仍授翰林侍讀宣德元年冬十一月也未幾
預修兩朝實錄初先生在獄時有一布衣老人鬚髮皆
白徧詣諸縉紳大夫門稽首曰李侍讀一忠臣今置之
死地宜急拯之以扶名教後先生復職求其人不復得
咸疑以為異人云厥後上臨內閣親賜諸閣老酒呼先
生賜之且曰卿非朕安得飲此酒先生頓首謝曰臣荷
陛下再造之恩不勝感激五年春上復以金甌賜諸閣

老宴以次該先生飲先生曰臣可與陛下同飲不可與陛下同器上遂易甌與之一時諸公咸服是年纂修兩朝實錄成欽陞本院侍讀學士兩京鄉闈二與文衡上臨軒策士兩為讀卷官是年秋先生抱風疾不語上賜鈔一千貫遣御醫與內臣逐日診視先生恐勞聖慮一日同寅諸公來視因囑曰主上問及幸告以疾漸瘳矣及痊入謝仍賜休息免早朝一日上納碎銀於兩袖召諸閣老游內苑將銀撒之于地命拾為買菓贍衆皆爭

取之先生獨正色立俟上退顧先生猶立上復呼先生以袖中餘銀親賜時論皆以先生得大臣體至每歲四裔入貢累累私自於朝班願一識先生面朝廷嘗命使於琉球諸國聞國人皆知慕先生得一詩輒朝夕諷詠不已其譽望見重於外藩者如是十年上崩先生哀痛雙目幾昏其忠愛之心又如正統初皇上嗣位先生與經筵講官三年四月修宣廟實錄成陞翰林學士與少傳建安楊先生諸公為杏園雅集時號九老會先生

給假祭祖東里先生不忍舍去以序送之其畧曰初李君時勉請去諸同官皆曰翰林者天子親臣君方握院章為之長且上富於春秋萬幾稍暇御經筵孜孜聖學奈何去先生曰諸公謂我者公義也顧今迫於私情二三年來子死妻死兄又死一門孤寡相望吾能忍而委置之乎東里之文真能述先生之心矣抵家葬其所未下土者若干喪時附邑之美地多為人所有先生欲擇山水之善者以安其靈遂躬自跋涉不以為勞四年還朝

六年閏十一月上以太學為天下教化之原蒞其職者不愜輿論衆議咸以先生薦遂任之先生至太學冠帶縉紳之士迎迓道左者相屬文武衆寮父老戎卒相率詣橋門而拜者無虛時監規久弛先生為嚴立教條因才設科壯而可仕者教以吏事如今官府論判之類幼而可進者教以舉子業日考課程夜則令宿學舍雖隆冬盛寒先生俯就講解經史每至通宵於是諸生各有所造就當時作人之盛如商輅姚夔彭時岳正萬安

諸彥俱廷試魁天下其餘或中進士高第或任御史黃
門部屬二司守令者皆先生教導之力致然也先生處
置細務綽有條理病者如徐瑄輩得以有醫死者如劉
顯輩得以有歸未娶者如鄭韶輩得以有室以至助教
陳除被盜復監見先生先生給之凡此之費皆先生捐
俸資為之由是諸生觀感亦樂為之助焉以故諸生事
先生如子事父先生以太學規模弗稱請於朝為改作
時監其事者素與先生弗協設他故而陷之太學生三

千餘人皆伏闕請宥諸生石大用獨封章乞代罪上覽
所奏有義在師生恩同父子之語憫之遂獲釋八年春
上命駕視學釋奠先師孔子禮畢退御彛倫堂賜先生
坐講書先是病嗽至是病愈講尚書闡明帝堯所以親
親仁民協和萬邦之道詞旨清遠天顏喜甚賜與有加
十二年屢以老疾上章乞歸有形骸潦倒精力衰頹之
語詞極懇切諸生有抗疏願留者先生益堅累表再三
始蒙俞允賜鈔二百錠官給驛舟以歸公卿大夫相率

餞別都門外不可以數計大學諸生皆曰先生歸矣吾何所視法哉遮道洒淚如別父母然諸生有歷政者則請假遠送在法司者則違假而往其恩義之篤如此今少傅吏部尚書王公為十題序稱先生漢之疏廣唐之楊巨源不能過少傅禮部尚書胡公序先生德學充贍政教一新諸生心悅而誠服兵部侍郎兼學士苗公稱先生洪熙間密陳讜言盡忠所職雖殞身而無憾工部尚書兼學士高公稱先生文學婉美陸贄忠義追蹤汲

黷道德比韓愈而詞翰特餘事耳少師楊公又稱先生忠槩文章卓然當時而士之識與不識皆知李先生先生之德之學見稱於文序如此先生抵家隱居縣城西近山水間別築一室其地曰梅壑慕名求文者無遠不至先生多以病謝去有不可已者勉應之十四年秋聞邊人內侵國家多難景泰元年三月建議四事一曰崇獎忠節二曰選將練兵三曰加恩死節四曰南北通好遣孫騏貴進是其忠義之心不以進退有異也孫既行

三日先生在別墅遭疾不豫醫診弗效時山有大石隕于池者人以為憂病篤戒諸子治後事如葬祖之儀言訖而逝景泰元年四月十二日也視其室惟經史文籍僅存四壁蕭然自藩臬以至郡邑大夫與夫遠近好義之士咸踵門弔哭往來不絕有司以事聞上命翰林撰文遣官致祭享年七十有七葬某里某山之陽先生存日恩贈父思誠翁翰林侍讀學士奉直大夫妣周繼王與妻劉皆封安人子養和養敬養源養健劉出也養道養

端次室劉出也養和養健先卒養道國子生先是助教
李洪嘗上章乞陞先生官秩以慰天下士夫之望至是
教諭邵祥乞加先生贈諡巡按江西都御史韓雍言先
生清德正學推重時輩忠言正論可方古人宜加封諡
請至再遂贈文毅嗚呼先生儀容清古語聲洪亮文詞
雄渾其忠義廉介卓然見重於天下而人獲接其光儀
者自不容以不敬畏之其沒也又莫不思慕之是可驗
天理民彝之在人心者有不可泯矣予愧謏薄叨承宿

誨慮先生德行政事未之盡傳於是廣採行實又得京
郡治中劉實國子學錄劉貴刑部員外潘瑄諸公所書
集而為傳庶他日立言君子出於其間得有所採俾事
業垂諸簡冊輝映古今則先生雖死而有不死者存實
斯文之幸也謹述以俟

古廬先生祠堂記

自古宏才碩德之士負人望之重者志不大展於當時
名必益彰於後世何也用不究其才而天下共惜之惜

之不已至形於言暴諸事則其名在世愈久而愈彰夫
如其榮過於得志於一時者遠矣吾安成古廬李先
生負天下之重望而官終於祭酒識者蓋深惜焉故其
沒也尚德君子交章請行褒卹之典最後巡撫江西右
僉都御史韓公雍列其誼行以請乃得諡為文毅當是
時有司已崇祀於學宮矣今提學僉憲潮陽李公齡復
命建祠于家而尊崇之益至嗟夫先生何以得此於人
哉蓋先生資稟秀異涵養深厚清德正學追蹤古人方

其為翰林侍讀也感太宗文皇帝作養之恩疏陳時政十五事言甚切直下獄踰年乃釋洪熙改元又條十事上之皆人所不敢言者坐是激怒宸衷命以金瓜撲之於庭不死降監察御史凡三日章復三上遂下獄宣宗皇帝嗣位出於獄親鞫之嘉其志仍釋為侍讀自是忠直之名震天下雖庸人孺子皆知尊而慕之正統中自學士為祭酒當國學政弛弊之餘慨然以成就賢才為己任嚴條約勤課試程才敘進一以至公而賑貧藥

疾恩意尤篤故教化行而人心樂從其出而取高科躋
要途者累累相繼於是天下皆知先生之教恩義兼盡
真一世之師表也既老懇乞休致家居而憂國愛君之
念不少忘比聞土木之難聖駕北狩痛憤累日即疏安
攘大政所宜先者遣長孫騏達於朝事未報而先生下
世矣天下之人又皆聞其事而壯其言謂先生忠毅之
氣沒齒不衰有如此嗚呼先生盛德之士也不獨忠誠
義氣為世所稱至其仁厚之心廡潔正直之行通達宏

偉之才雖一時名公鉅卿亦莫不推而下之然獨不得並列於公卿以大其用以霑其澤於天下宜乎人望有不滿焉而惜之深仰之至如此也僉憲嘗為國子師屬知先生為詳故景仰愛慕之尤切而遂欲因以垂教於來學此專祠之所以建歟祠在先生所居之左為間者二有門有廡不侈不儉實邑令黃巖李君會經營以成之其成也司訓桐廬姚君稷以書屬時記其意嗚呼二三君子惓惓於先生如此非尚德好義之尤者歟先生

得此名於是愈彰而不朽矣時念先生家食時與先祖
交莫逆父叔輩皆受學焉其教國子也時亦執經在諸
生後於先生文章道德之實耳熟而目詳矣此不能悉
著謹著其槩以詔其子孫興邑之來學俾相與勉慕以
追芳躅于萬一庶無負於僉憲公之教云先生名懋字
時勉別號古廉登永樂甲申進士翰林庶吉士授刑部
主事轉侍讀列學士至景泰元年卒年七十有七矣成
化四年歲次戊子賜進士及第資政大夫太子少保兵

部尚書兼文淵閣大學士知制誥同知經筵事國史總
裁彭時記

古廉李先生改遷謚葬墓碑銘

門人通議大夫國子祭酒進太常寺卿兼翰
林侍讀學士知經筵官掌詹事府事國史副總
裁致仕安成臺北吳節撰

士君子以忠毅存心生有美名歿有美謚此天下之所
同榮而古今之所共尚也然求有名實兼全與誦罔間

者其惟古廉先生乎按狀先生諱懋字時勉姓李氏安
成人古廉其號也系出南唐景王暹之後祖文明有隱
德考思誠贈侍讀學士母周氏贈安人先生兄弟五人
行居末早孤以兄誨為泮生以經取甲申進士第遭逢
太宗文皇帝作新文運選入中秘為庶吉士與二十八
人俱學業日益富預修永樂大典丙戌以慈制去服闋
赴行在預修高廟實錄壬辰授刑部主事未幾再召入
修實錄書完改翰林侍讀時宮殿災詔求直言先生開

陳十五事以進允者十三無何遭飛言下獄二十一年以近臣言得釋扈從巡北邊出關折左股輿歸療愈洪熙元年先生以荷國厚恩恩圖報稱具為二本其一言朝政得失其二不避國諱仁宗皇帝初皆舍之中人從而擠之召問不屈命力士撲之以瓜折左脇曳出不死改監察御史今日言事翌日下錦衣獄禁錮之宣宗皇帝嗣位召問所言先生奏對懇切感動上心特命宥之復翰林侍讀預修兩朝實錄五年夏特陞侍讀學士一

日駕幸史館特呼先生名與之金錢賞以卮酒衆學士
榮之壬子主南京鄉試癸丑得疾上聞賜寶楮二百命
醫治療乙卯英宗皇帝嗣大寶詔修宣廟實錄秋主京
闈鄉試丙寅進經筵講官廷試為讀卷官戊午實錄成
陞本院學士是年夏先生以諸子融敬早卒二配劉氏
俱亡給假還鄉祭祖改葬諸兄於善地事畢還京六年
陞國子祭酒八年重建太學成命代祭聖賢告畢工甲
子春上親臨太學釋奠於先師孔子禮成視學賜坐先

生講書經帝堯章善陳諷諫上大悅明日賜衣二襲宴於殿庭而還先生益加感激嚴立監規修陳防範諸生數千人咸引領克遵教誨由是賢才彬彬輩出掇殿魁者如商輅彭時諸公出馬丙寅復以中子源剛繼卒惟幼子良侍諸孫皆幼稚具本乞休致不許未幾復上章乞骸骨凡數百言益懇切上特許之賜寶楮筵宴具驛舟遣還縉紳俱祖道餞送之盛於是鮮倫先生既歸居邑之西山曰梅塢謝絕人事日與文士數人為山水游

景泰紀元聞敵人犯邊王師不利奮然曰禁中無頗牧
安攘孰任耶特遣其孫騏詣闕言軍旅事數件因憤憤
成疾遂不復瘳歿於別墅時四月十二日也享年七十
有七有司以聞詔加悼惜遣官致祭葬本里楓鋪之原
巡撫西江都憲韓雍言先生清德正學推重時輩忠言
正論可方古人宜加封諡章凡再上詔賜諡文毅督學
僉事李齡以先生葬地不應陰陽下知縣李會營善地
改葬先生於蒙岡之陽某山某向從衆議也天順初元

言者復謂先生諡法不愜輿情宜於改諡詔改諡曰忠文仍錄其一孫曰昂為國子生迨成化癸巳先生之孫顯任長樂知縣便道歸省祖塋謂先生諡葬俱改宜有銘文以彰事實謂予有姻好且承先生宿誨者來需言予事先生久既幸有名位又獲全歸思先生不可見矣可無言乎嘗聞諡法云事主不欺之謂忠強忍不屈之謂毅今先生之諡易文毅為忠文先忠而後文則先生忠以事主文以經邦二者又兼備矣語曰生榮死哀惟

先生有馬謹述其始末而為之銘銘曰

稽古訓言君明臣直二美克完政紀乃立吁嗟先生
忠毅拳拳遇事憤發不恤盡言折肱挫獄推頽者幾
起而復言不恤瀕死在周萇鮪在漢黯朱為贄為愈
抑何間歟究茲終始實遭明聖包容狂直以懲諛佞
晚躋榮福為國碩師解組而返終樂畋虞善名蓋世
美諡重錫易毅為忠芳流千億蒙山之陽波濤湯湯
先生之譽其存者長

難少承先生誨導俾侍筆硯間及先生歸榮與解組
又得執巾杖為山澤游俱非一日也豈期先生物故
遺藁多失遂與諸孫及交游士大夫通得若干謹錄
成四冊別以文行忠信質之同門吳卿與儉曰汝當
以書付其孫知縣顯鉁梓以傳愚受先生指教之恩
誼深淵海是集焉敢不用情者乎餘文散失尤冀斯
文君子採寄示予續編可也皆成化十年甲午仲春
吉八十七翁門生戴難跋

顯惟先大父忠文公平生所著文集甚多奈歲久散
失存者無幾門人戴先生嘗編錄成卷若干篇國子
祭酒吳先生又為序以弁其端顯以菲材弗克繼述
叨承前休授今惠之長樂令嘗於公退之暇覽大父
手澤不勝感戚於是遍求餘藁而增益之繕寫成帙
特以託廣郡守鄉先生伍公希淵重加校正鋟梓以
傳雖然先祖之居官行實昭然名於當世固不待
文而顯然禮曰先祖無美而稱之是誣也有善而弗

知不智也知而弗傳不仁也此三者君子之所恥也
苟是編不傳則不智不仁之恥顯莫逃焉匠氏告完
姑述其槩以紀其成柳子有云至哀無文至敬不飾
顯竊以馬孝孫顯謹識


古廉文集卷十二

古廬文集後序

翰林學士國子祭酒古廬李先生之歿三十餘年其孫
顯宰惠之長樂數年始克彙集先生文稿若干卷託廣
州郡守鄉先生伍公校正壽梓以傳屬予一言以序諸
末簡予觀先生之文渾厚醇正博洽瞻麗淡然菽粟之
味鏘然韶鈞之鳴真可以追蹤古人卓冠當世後生小
子安敢容喙於其間哉然予少居鄉閭聞先生之忠言
謹論切於時政一時名聞海內如景星鳳凰天下之人

爭先而快覩焉及予叨領鄉薦宦遊四方先生雖已物故而凡見公卿大夫出自先生之門者無間隱顯莫不相與感慨夫先生之儀刑有不可得而復作焉是則先生之忠義德教傳之天下浹於人心愈久不忘而況於文章之作有不足以歆動於人而傳於世耶夫泰山之峻絕天下之人雖不盡見而皆知其為高河海之浩瀚天下之人雖不盡涉而皆知其為大先生之文本之以道德參之以才氣而又浸淫乎六經蒐獵乎百家其言

辭之發見諸行事之實皆足以扶世立教正君善俗如是而鳴當時傳後世豈不猶泰山河海之高大天下之人幸而見之者莫不有以快其心目焉雖然此特先生之餘事爾至於臨大節而不可奪者載諸史冊而無愧勒之金石而不磨千載之下猶可以使人感慕興起奚翅文章之傳而已哉姑書以為序云成化十七年辛丑歲冬十月既望廣州府儒學教授吉水蕭尚彛序



古廉文集後序